

Date – 11/09/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Mizoram State Tax Commissioner-in tun thla ni 22 atanga hman tur, GST rate thar angin sumdawngte chu an bungraw man tihniam ve turin a hriattir.
- 2. State Assembly in Forest Conservation Amendment Act 2023 a pawm duh loh lantirna Joint Civil Society of Mizoram (JCM) huaihawtin vawiin khan Vanapa Hall kawtah neih a ni.
- 3. Prime Minister Narendra Modia leh Mauritius Prime Minsiter Navinchandra Ramgoolam te chu vawiin khan Varanasi ah an inkawm
- 4. Union Home Minister Amit Shah chuan vawiin khan Fast Track Immigration-Trusted Traveller Program a hawng.

<><><>

GST REFORMS

Mizoram State Tax Commissioner-in tun thla ni 22 atanga hman tur, GST rate thar angin sumdawngte chu an bungraw man tihniam ve turin a hriattir a, dan zawm lo te chu hrem theih an nih thu a sawi.

State Tax Commissioner thuchhuah tarlan danin, India rama GST rate thar hman tur hi tun thla September ni 22 atanga hman tan tur a ni a, bungraw tam zawkah GST rate tihhniam a nih dawn avangin GST registration nei sumdawngte pawhin GST rate hniam takna bungrua te chu a man tihniam ve turin a hriattir a, chutianga ti lote chu GST dan hnuaia Anti-Profiteering measure hmanga hrem theih an ni thu sawiin, mipuite chu rate hniam tûra ngaih hniam lova zuar/hralh an hriat te chu Taxation Office hrang hrangah te complain turin a chah a ni.

Hei bakah hian sumdawngin GST Return an file-in an inhralhna chu anmahni dawrtute hnena Tax Invoice an pekchhuah mil thlapin an tilang tur a ni a ti a. An Turnover chu an tax invoice pekchhuah copy hmanga thuneihtute hnena finfiah thei tura vawngtha tura chahin, a zawm lo te chu pawisa chawi tir an nih tur thu a sawi bawk a ni.

Mizoram BJP Vice President Pu Vanupa Zathang chuan sorkar laipuiin GST siamtha a, bungraw tam takah rate an tihniam chu mipui dinhmun enin a fuh hle a hriat thu a sawi.

Akashvani Aizawl zawhna chhangin, Pu Vanupa Zathang chuan Mizoram anga state rethei ah trade and commerce leh sumdawnna dangte a la san loh avangin GST rate sang chu mipuiten an la tlin lo a ti a, tunhnaia Union Finance Minister-in GST rate a tihniam chu a ti fuh hle a a hriat thu leh vantlang mipuite hamthatna tur dik tak ni a a hriat thu sawiin, GST rate hniam chuan nasa takin mipuite a chhawk zangkhai dawn a, sumdawng leh dawrkaite tan kawng a sah thui theih a rin thu a sawi a, he GST siamthatna hi mipuite tan a tha hle a ni a ti.

Byte: BJP Vice President Pu Vanupa Zathang

Corr: Maremi

<><><>

JCM PROTEST

Joint Civil Society of Mizoram (JCM) huaihawtin vawiin khan Vanapa Hall kawtah Assembly Session neih zawh taka Forest Conservation Amendment Act 2023 pass tak duh lohna leh dodalna hun hman a ni.

SFX: Protest

He hun kaihruaitu JCM Convener Dr Lalbiakmawia Ngente chuan Mizoram Assembly Session in FCAA 2023 a pawmna chu ram dahkhamna a nih avangin sorkar laipui hmalakna in Mizoram pumpuiah project of national importance tih changchawiin hma a lak vek theih tihna a lo ni ta a ti a, Mizoram inven theihna awmchhun pakhat, Article 371 G chu hman theih a ni tawh lo a, sorkar laipui hmalakna chu state sorkar leh Mizo mipuite chuan sawi theihna dan leh dan theihna dan an nei tawh lo a ti. Mizoram Assembly in FCAA 2023 a pawm veleh sorkar laipui chuan chak taka hmala nghalin, tun thla September ni 8 khan Ministry of Environment, Forest and Climate Change chuan Office Memorandum tichhuakin ram venhimna atan a pawimawh nia hria in, Rare-earth elements chak taka lakchhuahna turin fast tracking of projects a puang chhuak nghal a, hetah hian environment leh ramngaw humhalhna tura pawimawh environment impact assesement leh vantlang mipui rawnna te pawh a awm thei tawh dawn lo tih a sawi a ni.

Byte: Dr Lalbiakmawia Ngente

Mizoram First aiawha thusawi Pu ZR Thanghmingliana chuan FCAA 2023 dodala mipui pungkawmte chuan hmasawnna an hlau lova, Zofate'n Mizorama an thuneihna an hloh an hlau a ti a, FCAA chuan ramngaw chauh a nghawng lova Mizote tualzal nun a nghawng dawn a ti a, Mizoram sorkar hruaitute chu sorkar laipuia atanga pawisa an hai chhuah theih loh avanga FCAA 2023 an pawm tawh chu sut leh tura ngenin, he dan pawm lo hian Mizo mipuite chuan Mizorama atangin pawisa an hai chhuah theih a rin thu a sawi a ni.

Centre for Environment & Social Justice aiawha thusawi Joseph Hmingropuia leh Mizoram Transformation Movement aiawha thusawi Dr Vanlalsiama Chhange te pawhin Mizoram Assembly Session in FCAA 2023 a adopt an duh loh zia leh

Mizoram dinhmun a tihderthawn zia te sawiin, Mizo thalaite chu harh chhuak a, ram leh hnam tana ke pen chhuak a, hmasawnna hming pu a central kuta Mizoram a awm phal lo turin an chah a ni.

Social Activist Pi Vanramchhuangi (Ruafela Nu ti a hriat) chuan NGO intelkhawm chuan tuna Chief Minister Pu Lalduhoma ho hian FCAA 2023 hi an lo dodal tawh thin a ti a, Mizoram sorkar chuan FCAA 2023 hi sut hma chuan an nawr zel dawn tih sawiin, a tul chuan chaw nghei leh total bandh te pawh an la huaihawt dawn a ni a ti.

Byte: Ruafela Nu

JCM huaihawt FCAA 2023 duh loh lantirna hi NGO leh Political Party hrang hrangten an thlawp angin he hunah hian Party hrang hrang hruaitute pawhin thu an sawi a ni.

Corr: Maremi

<><><>

BJP PRESS CONF

BJP Mizoram State President Dr K Beichhua an Bairabi atanga Sairang rel kawng hawn tur chuan Mizoram chu hmalam hun eng tak a siamsak a ni a ti.

He thu hi vawiina BJP Mizoram State Office Upper Republic Mipui Run-a Prime Minister in Mizoram Railway a hawanna tur chungchanga thuthar thehdarhtute a kawmnaah sawiin, Dr K Beichhua chuan Bairabi atanga Sairang rel kawng hawng tura India ram kilkhawra awm Mizorama Prime Minister Narendra Modi-a a lo kal tur chu lawmawm an tih thu sawiin, Mizorama mi tute pawh an lawm a rin thu a sawi a, tun atang chuan Aizawl chu Railway Map ah a awm ve tawh dawn a ti.

Hmarchhak state khawpui zingah rel kawngin a pawh 4 zingah Aizawl a tel ve tawh tur chu ropui an tih thu sawiin, inkalpawhna lamah leh kawng hrang hrangah hmasawnna tam tak a thlen dawn a ti a, he hmalakna hi hmasawnna huapzo tak ni a an hriat thu sawiin, rel chuan khualzinte chauh ni lovin bungraw tam tak rang zawk, chak zawk leh tlawm zawkin a phur sak dawn a ni a ti.

Byte: Dr K Beichhua

Dr K Beichhua chuan he project hi 2008 atanga 2009 inkarah pawm a ni tih sawiin, kum 2014-ah Prime Minister Narendra Modi an a lungphum a phum a, kum 11 he project hi an thawh chhung hian tlang leh Luikawrte tan tlanga rêl kawng siam a ngai a, kilometre 51.38-a thui rel kawng ah hian leiverh 48, kilometre 12 a thui bakah lei lian 55 leh lei te 87 siam a ni a ti a, bridge number 116-na phe chu metre 104 laia sang niin, India rama lei dawh sang ber pawl a ni a ti.

Corr: Maremi

<><><>

COURT ORDER

Vawiin khan PWD, Kolasib Division Office, Tumpui Venga awm chu Court order hmangin kalh sak ani.

Mizoram PWD chuan kum 2013/2014 bawr vel khan Serkhan leh Bagha inkar Kawngpui laih zauh hna thawkin, mimal ram tam tak a tihchhiat sak a. Ram neituten Zangnadawmna an hmuh tur zat pawh sorkar thuneitu ten an bithliah fel a, amaherawhchu chhan hrang hrang avangin Zangnadawmna hi pek fel mai theih a ni lo a. He thubuai hi Kolasib District Court-ah hun engemaw chen a inchiah hnu in, nikum December khan Kolasib Fast Track Court chuan ram neitu ten Zangnadawmna an dawn tur te chu PWD-in thla 2 chhunga pe fel turin order a lo tichhuak tawh ani.

Kolasib Court order hi PWD lam chuan an tih hlawhtlin mai loh avangin ram neitute lungawilo chuan Kolasib District Court-ah kumin March thla khan Execution Petition an file a, Court chuan hun tiam siam sak leh mahse PWD-in zangnadawmna chu an la pek theih loh cheu avang leh thu mumal an neih theih loh avangin Kolasib Fast Track Court Judge, Pu R. Vanlalena chuan PWD, Kolasib Division bik Office building, Tumpui Veng, Kolasib a mi kalh sakna tur Order chu a tichhuak ta a ni. Hetih rual hian PWD Office lirthei leh JCB te bakah khawl lian dang engemaw zat chu Court hian a hrensak bawk ani.

Zangnadawmna tur sum hi a vaiin cheng vbc 3 nuai 42 sing 2 & 5,444 a ni a, ram neitute hi mi 62 niin, Saiphai leh North Chaltlang khua mite an ni.

Tun hnaia Supreme Court of India order khauh tak avangin Execution petition te hi thla 6 chhung a chinfel ngei ngei tur a ni.

(Andrew Kolasib PTC)



BCM

BCM Thingfal Mamte veng Biakin chu vawiin chhun dar 12:20 vel khan a thlanga Motor kawngpui NH-54 Lawngtlai panna kawng NHIDCL in laih vangin a chim.

Thingfal VCP Pu Rammawia hnen atanga thudawn danin Biakin chhungah hian nizan khan khi a awm tih Kohhran hruaitu ten an hmu a, tukin khan Pastor, Kohhran hruaitu te leh khawtlang hruaitu ten an en ho a, zing lama an en ho ai hian chawhma dar 11:00 vel ah khi zau zelin Pulpit bul thleng a khi tawh a, a chhunga bungruate thiar chhuak in an hnattlang a, bungrua an thiar chhuak zo fel vek hman tihin chhun dar 12:10 vel khan a chim ta a ni a ti. Biak In chim avang hian mihring hliam an awm lo a ni.

Pu Rammawia VCP sawi danin Kohhran hian NHIDCL hnenah Biakin a chim loh nan Retaining Wall sang leh leh rinawm tawk tak siam turin an lo hrilh tawh a, mahse NHIDCL hian Retaining Wall hniam te chauh an siam a, hei hian Biakin hi a hum zo ta lova, a chim ta a ni.

An Biakin chim avang hian Kohhran mipui te an rilru a na in an tap a, Biakin hi nikum a hawn kha niin a sak nan hian cheng nuai 30-40 vel an hmang a ni.

(Thangmingliana Renthlei Lunglei PTC)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM

Prime Minister Narendra Modia leh Mauritius Prime Minsiter Navinchandra Ramgoolam te chu vawiin khan Varanasi ah an inkawm a. Ram pahnihte hian thawhdunna tur inremna thuthlung pali an ziaak. PM Ramgoolam hian nimin khan Varanasi hi a lo thleng a. Thuchhuah intawm an siamah Prime minsiter Narndra Modia chuan ram pahnih thawhdunna tihngheh zel an rem ti tih a sawi a. India leh Mauritius chu ram pahnih ni mahse an hmathlir erawh thuhmun a ni a ti a. PM Modia chuan ram pahnih thawkdun mai niloin chungkhath ang hial an nih thu a sawia ni. Pu Modia chuan vawiina inremna an ziah zingah hian IIT Madras leh Indian Institute of Plantation Management ten University of Mauritius nena thawhdunna a tel thu a sawi.

(Byte)

(Newsonair)



UNION HM

Union Home Minister Amit Shah chuan vawiin khan Fast Track Immigration-Trusted Traveller Program chu video conference hmangin Lucknow, Thiruvananthapuram, Trichy, Calicut, leh Amritsar airports ah te a hawng. He program hian a tum ber chu ramdang atanga India mi lo zinte tana awlsam taka phalna lak theihna tur a ni a. Ram venhimna atan a pawimawh hle dawn tih a sawi bawk a ni.

(Newsonair)



GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah

lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST tharah hian sawrkar laipui chuan lirthei zuara eizawngte tana chhawr theih tur kalphung thar a siam a. Lirthei ke hnih nei zignah 350cc hnuaia lamah GST zaa 28 lak thin chu zaa 18 a tihhniam a ni a. Sumdawna atana hman bus, truck, three-wheeler leh auto part ah te zaa 18 lak a ni tawh dawn bawk a ni. Lirthei zuara sumdawng Ranjit Mishra chuan GST thar chu Diwali thilpek anih thu sawiin mi narante tan nghawng tha tak a nei dawn tih a sawi a ni.

VC

(Newsonair)

